



Concert sinfonic dalla Filharmonia da combra Grischuna Sinfonia nr. 2 da Beethoven e canzuns da Nadal cantadas digl Ensemble Corund

DA PAUL DUFF / FMR

■ **Sora Madleine dalla claustra dallas soras dominicanas da Glion ha beneventau in vast publicum, ils musicists dalla Filharmonia da combra Grischuna, il Chor Ensemble Corund ed il dirigent Stephen Smith.** Il venderdis vargau ei quella illustra societad seradunada en baselgia claustrala a Glion. Sora *Madleine* ha dau sin via la vertid d'engraziar, quei che basegni dignitad e resplespect e carezia al concarstgaun. Envidau all'occurrenza ha la vischnaunca Ilanz/Glion e sia presidenta *Carmelia Maissen* ha dau als presents il beinvegni e giavischau tut bien sin via egl onn niev.

Beethoven il revoluziunari

Quei attribut astga vegnir affiliaus tier il musicist dil Rein, Ludwig van Beethoven, naschius a Bonn igl onn 1770. Cun 30 onns ha el cumponiu sia secunda sinfonia. Era da gliez temps la fuorma da sinfonias definida dallas cumposiziuns da Joseph Haydn e Wolfgang Amadeus Mozart ha Ludwig van Beethoven cumponiu, sin fundament da talas normas, novas valurs en sias ovras sinfonicas. Ils tuns animai en in serein divertent han fatg plaz a grondezia maiestusa. Beethoven demussava simpatia per Napoleon che menava la revoluziun franzosa a novas dimensiuns politicas e geograficas. Senza ver in context politic ei quei tutti-

na da percorscher ella sinfonia nr. 3 numada «Eroica» cun himnis e marsch funèbre.

Cura che Napoleon ei s'encorunau sco imperatur ha Beethoven condemnau quei act e scungirau il spèrt dil despot franzos. Ils 5 d'avrel 1803 ha il cumponist dirigiù la premaudiziun dalla secunda sinfonia el «Theater an der Wien».

Grondezia a la moda Beethoven

La Filharmonia da combra Grischuna ha sunau cun perschuaus l'ovra sinfonica. Ses dirigents precedents ed il present *Philipp Bach* han intermediau quei art sinfonic als musicists cun sunar pliras sinfonias da Beethoven. Ei ha valiu che la formaziun a Glion ei stada pli pintga che la directiva dil cumponist. La dira acustica dil cubus basilic ei vegnida emplenida cumpleinamein, gie al cunfin dil supportabel.

Maletgs da tuns en dinamica varionta han creau in spanetg sco era l'opposiziun dils strieders encunter ils instruments da flad ella part finala. La melodia deraisa optimissem e speranza, da percorscher gia el tetel dallas quater parts dadas dil cumponist cun «Allegro con brio; Largo; Scherzo-Allegro; Allegro molto», in ver «viva» per Daniev.

Glisch nuvia la stala

Tuns tut differents ein suandai, igl Ensemble Corund cun quater cantaduras e

quater cantadurs ein semess davos igl orchester sin scalem pli ault. La historia da Nadal ei resunada en vocals da cumponists engles ed americans, en melodiusa tonalitat ed en ritmica e tun da jazz. Ils cuntegns da «pasturs, aunghels, bov, asen e la sontga famiglia» sco il dirigent *Stephen Smith* ha introduciu la part, ein enzugliai en corals ch'il quartet dubel ha cantau en solos, en duets e da cuminonza en tontas variantas. In ver deletg! Completamein semidaus ei era il tun digl orchester grischun. Ils sunadurs ein s'adattai alla situaziun cun fin sentiment musical. Mai ha la part musicala cuvretg il cant, gnanc els pli frestgs fortes. En quella zartezia ei da percorscher la qualitad digl ensemble orchestral. Fatschas rientas relatan la levadad els registers, ch'ei carschi per la caussa. In fatg ch'aulza la formaziun sin in ault scalem professiunal renconuschius sur ils cunfins da nossa tiara. Sin medema altezia ein las cantaduras ed ils cantadurs digl Ensemble Corund stai. En fuorma d'ina cantada han els finiu la part ufficala dil concert cun «Fantasia on Christmas Carols» dil cumponist engles Ralph Vaughan Williams (1872–1958).

Il supplement dalla canzun «Shepherd's Pipe Carol» da John Rutter ha terminau la sera musicala ed il publicum, engrazievels per la purschida, ha bandunau la baselgia cuntents cun cor plein musica.



La Quotidiana
7007 Cuira
081/ 255 57 10
<https://www.suedostschweiz.ch/laquoti...>

Medienart: Print
Medientyp: Tages- und Wochenpresse
Auflage: 3'917
Erscheinungsweise: 5x wöchentlich

Seite: 3
Fläche: 57'020 mm²

Auftrag: 3009371
Themen-Nr.: 140.008

Referenz: 75975625
Ausschnitt Seite: 2/2



Il dirigent Stephen Smith ha dirigi la Filharmonia da combra Grischuna e siu Chor Ensemble Corund.



Carmelia Maissen, presidenta dalla vischnaunca Ilanz/Glion, admetta buns giavischs per igl onn niev als presents dil concert.